

## Ami? Ladron?

Hende sa inventá splikashonnan kreativo pa ekskúsá nan maldat! Algun aña pasá na nos isla, un akusado a splika hues ku ora e ta drumi ku beter den su kurpa e sa lamta kana den su soño i ta bai hòrta. Segun su abogado, e hóben ta poseé di un spiritu malu ku ta pon'é kohe kos di otro hende.

Hustifikashon ridíkulo asina no ta konvensé Dios. Su Dies Mandamentunan ta kategóriko: “*No hòrta*” (Eksodo 20:15). Nos tur ta aseptá ku ta malu pa hòrta i asta nos ta despuesto pa klasifik'é komo “piká.”

Ma hopi hende tin un definishon sumamente limitá di hòrtamentu. Segun nan, ladronisia ta enserá algu di balor supstansial, manera robo na banko òf hoyeria. Nan tambe ta kondená e chòler ku ta kohe pertensianan den un kas. Esun ku ta kohe kabritu di hende tambe ta ladron. I sigur sigur e pesona ku ta kohe MI pertensianan ta ladron! Nos tur ta konvensé ku “No hòrta” ta apliká na hende den kasonan asina.

Ma ta esei so Dios a prohibí ora E ta bisa “No hòrta?” Hopi di nos ta mashá ladron! Nò, no ladron ku máskara na kara, bistí na paña pretu, gatiando den skuridat di anochi. Nos ta ladron desente, sofistiká, astuto! Nos ta ignorá Dios Su mandamentu “No hòrta,” anto ta hari chikí chikí. Nos ta kere ta mashá kos nos a hasi ora nos ta logra tuma un hende kabes abou.

Mirando nos akshonnan i aktitut, nos mester keda strañá ora nos yunan—ku ta opservá bon e ehèmpel nan mayornan ta duna—ta kohe kos di hende? Nan a siña nan lès bon serka nos!

**Dios Su mandamentu, “No hòrta” ta válido pa TUR kaso di hòrtamentu, sin eksepsion.** E ta apliká na e alumno ku den ora liber ta bai pakus, hinka un repi di chukulati den tas, i ta sali sin paga p'é. Ta hòrtamentu (no “suerte”) ora un ama di kas ta keda ku e florín di mas ku kahera a debilbé. Dios Su mandamentu “No hòrta” ta kontá tambe pa esnan ku ta bai Florida i ta bolbe ku souvenir di nan biahe: e sèt di serbètè di e hotèl unda nan a keda i bestèk di liña aéreo. Ta hòrtamentu ora bo ta gaña ku bo yu no a hasi diesdos aña ainda pa e no mester paga un pasashi komleto p'é.

Un empleado ku sin pèrmit ta usa telefon na trabou pa hasi yamadanan personal pa Kòrsou òf Hulanda, ta kulpabel di violá e di ocho mandamentu. Trahadónan di kontratista ku ta bai ku klabu òf hèrmènt pa traha nan mes kas ta hòrta. E argumento ku empleadonan ta usa pa hustifiká nan piká ta ku doño di trabou no ta paga nan basta. Komo ku dunadó di trabou ta debe nan, nan solamente ta fasilitá doño di trabou dor di bai kas ku e klabunan. Ekskusa interesante! Piká mahós!

Ora un persona ta falsifiká sífranan di inkomstenbelasting, e ta violá Dios Su mandamentu. Un empleado ku ta laga “prek” p'é 7:30 ma no ta yega te 8:15, tambe ta ladron! Pa fia player, kòmchi, òf buki i “lubida” pa debilbé nan, ta un otro akto di ladronisia. Pa probechá di un señora ku no sa diferensia entre radjeter i karbureter i pon'é paga pa piesanan ku su outo no tin mester, ta robo. I ta bon pa komersiantenan evaluá onestamente si nan ta kulpabel di hòrta poniendo preisnan demasiado haltu.

Esaki ta “pikimentu di pieu”? Mi'n ta kere. **Dios no a spesifiká e montante ku bo mester hòrta pa bo ta un ladron. Beibel ta prohibí TUR hòrtamentu.** “No hòrta” ta apliká na kualke kos—chikitu òf grandi—ku bo ta kohe di otro hende.

No lubida ku **tur ladron “profeshonal” a kuminsá nan “karera” hòrtando kos chikitu.** Beibel ta bisa bon kla: “*No laga nan gaña boso...ni ladron...lo eredá reino di Dios*” (1 Korintionan 6:10). Dia ta bin ku tur hende mester para dilanti Dios i duna kuenta pa loke nan a hasi den nan bida, inkluiendo tur esnan ku ta hòrta. E dia ei ekskusanan eksótiko lo no yuda.